





Señor L. Brown di Proyectbureau Village ta dunando DIARIO un splicacion con Village lo keda.



## Ya caba mas di 70 cas a worde construi Village lo haya un cara nobo

*Prome cu fin di aña lo cuminza construi 38 cas mas*



ORANJESTAD(AAN) -- Desde 1980 a cuminza cu e proyecto cu ta encera mas o menos 400 cas na Village.

Pa logra esaki mas o menos 200 cas a worde basha abao pa asina haya espacio pa construi otro. Tambe tin casnan cu a worde renova. Den e caso aki F.C.C.A. a financia e habitantenan material pa asina nan por haci e trabaonan di renovacion.

Como prueba a construi 5 cas cu a resulta bon. A sigui cu construcion di 23 cas na e parti Sur

di Village y actualmente ta trahando ariba dos proyecto esta uno cu ta consisti di 36 cas y e otro cu ta consisti di 16 cas.

Informacion cu DIARIO a ricibi ta muestra cu henter e tereno ariba cual Village ta situa tabata propiedad di hende. A resulta cu e tereno tin diferente doño y Gobierno a hiba combersacion cu tur e doñonan pa asina cumpra e tereno.

Mayoria di e doñonan a bende nan tereno mientras cu algun nan punto di bista tabata cu si nan keda cu e tereno te ora actividadnan cuminza tuma lugar, nan lo haya mas placa.

Por bisa cu mas o menos 90 % di e tereno ta compra. Actualmente Gobierno ta negociando pa haya e tereno den vecindario di watertoren y e tereno caminda den pasado un supermercado a kima.

E infraestructura di Village ta encera cable nobo di Elmar, riool nobo, camindanan nobo, tubonan di awa nobo, lineanan di telefoon nobo. Por conclui cu Village lo haya un cara nobo.

Notable ta cu e casnan nobo ta worde construi mas leu for di

otro compara cu esnan cu a worde basha abao. Esaki ta pa e ventilacion.

Mayoria di e casnan ta worde construi cu un camber ya cu tin hopi hende di edad ta biba den Village. Tambe a construi casnan cu dos y tres cambef.

F.C.C.A. ta evalua ken lo bin na remarke pa un cas cu mas camber. Esaki ta depende tambe con grandi e familia ta. Pa loke ta trata e camindanan esakinan lo ta mas o menos 3 meter hanchu. E intencion ta pa reduci e cantidad di autonan cu ta circula den Village. E camindanan ta yega na tur e casnan den Village esta cu den ora di un emergencia, bombero, ambulance, Polis por yega na e sitio cu nan mester bay.

E expectativa ta pa prome cu fin di e aña aki cuminza cu un otro proyecto cu ta encera 38 cas mas.

Gobierno a institui un comision cu tin e tarea pa pone nomber pa e cayanan den Village.

Ariba combinacion di e fotonan por constata cu e casnan cu ta worde construi ta hopi bunita y ta duna Village un cara nobo.

